

U U' ITZ'IB'A B'EN U PABLOXE' Q'U NIMAN TETZ U JESUUSTU EEFESO

Yol ti' u u' tza'

U Pablo tz'ib'an u u' tza'. A' itz'ib'av b'en xe' q'u niman tetz u Jesuus tu Eefeso. Tu Roma itz'ib'av k'asu'l tixo'l q'u ya'b' 59 — 61 m.t.J. A' chit atich tu preeexhuil.

A' vib'o'q'ol nital u Pablo tu q'ul iyol tza' aas ma'loj chit iatz q'u niman tetz u Jesuus tib'ilaj, k'uxh kam ko'xh aanimail sijununil.

Ye' ootzajib'e kani'ch tok q'u b'axa chaj aa Eefeso ti' inimal u Jesuus. Loq' atil iyolil tu Q'u B'a'nla Chaj Kam B'anel (Hechos) 18.24—20.1. Kamal u Aquila tuch' u Priscila chikon b'axa. Ech xamtel tuul opon u Apolos. Utz ech tek u Pablo. Oxva'l ya'b' i'an u Pablo tzi'. Xamtel tek tuul itzaq'taka q'u ansiano u Pablo aas a' chit ib'en tu Jerusaleen. Choktaj Q'u B'a'nla Chaj Kam B'anel (Hechos) 20.17-38; Q'u Kam Ib'axab'sa Ik'uchax U Tioxh (Apocalipsis) 2.1-11.

A' u jatxb'al tib' q'u yol tu u u' tza'!

- 1) 1.1-2 Nitaq' ichajlichil q'u niman tetz u Jesuus.
- 2) 1.3—3.21 Niyolon ti' u mam b'a'nil va'l ul i'an u Jesuus ti' vichitpune'.
- 3) 4.1 —6.20 Nichusun ti' aas kani'ch tiq'ol u atinchil k'atz u Jesuus. Niyolon ti' q'u doon majte. Aya' q'u'l nitaq' u Tioxh ti' taq'ax iyak'il q'u niman tetz u Jesuus.
- 4) 6.21-24 Ech vitzojpu q'u yol tu u u' tza'!

Q'u Niman Tetz U Jesuus Tu Eefeso. 1:1ii Q'u Niman Tetz U Jesuus Tu Eefeso. 1:6

***U U' ITZ'IB'A B'EN U PABLOXE' Q'U NIMAN
TETZ U JESUUSTU EEFESO***

Ichajlichil q'u niman tetz u Jesuus tu Eefeso

¹ Nuntz'ib'a opon u u' tzexe' tza' hermanos jank'al ex nimamal u Cristo setaq'o atilex tu Eefeso utz, tii etatin k'atz u Jesucristo. In Pablo, ichaj u Jesucristo titxumb'al u Tioxh. ² Utz taq' koj ku' vib'a'nil u Tioxh seti', aya' u kuTat tu Amlika, tuch' u kuB'aal Jesucristo. Utz taq' koj u paas tetaanima majte.

Viq'aq'al yinimal u Jesuus

- ³ Techal chit u Tioxh, viTat u kuB'aal Jesucristo tan, kajay mamaj b'a'nil vettaq' qe tu Amlika tib'a'nil u Cristo tu u qatin k'atz u Tioxh.
- ⁴ Tan tiq'aq'al ko'n k'uxh aya'xchen itxaat'o' u Tioxh aas ye'sajich ichee u vatz amlika tx'ava'. A' isa' sakunima, saxaane'lo' k'atz paav. Ech ye'k kupaav tu u qatin siatz.
- ⁵ Tiira tu taanima cheeka aas taq'b'eno' sik'aol ime'al ti' u kunimat u Jesucristo. Tan ech nal chit u b'a'nil nititz'a qi'. Te elka aas i'an tii qi'!*
- ⁶ Echixe'at b'enamen niqoksa iq'ii u Tioxh ti' u techalla b'a'nil veti'an qe tiq'aq'al viTxaaom va'l tiira tii ti'.

* **1:5** A' tok u yol tzi', taq'ax b'en k'aol me'ala ma'l tal nitxa' aas yit' k'aol me'ala koj. A' va'l ni'an q'u nan q'u'l yit'ix chee titz'in. Nijaj ma'j tal titz'in utz, ta'n tek nib'ens tetz. Nib'en ib'ii ti' utz, tiira titz'in teku'en, k'uxh yit' titz'in koj ti' vikajal. Ech va'l ni'an u Tioxh tu q'u niman tetz ta'n tek nib'en ik'aol ime'al tiq'aq'al va'l i'an u Jesuus. Choktaj Q'u Niman Tetz U Jesuus Tu Galaacia 4.5; Q'u Niman Tetz U Jesuus Tu Roma 8.14-17.

Q'u Niman Tetz U Jesuus Tu Eefeso. 1:7iiiQ'u Niman Tetz U Jesuus Tu Eefeso. 1:14

- 7 K'uxh vetikuy q'u kupaav tan, ti' atzi' aas tiira sib' vib'a'nil qi'. Utz vetitoo'o' tu vikajal va'l el qi'.
- 8 Utz ni'xhik'uch u Tioxh aas nojchit tii qi' tan, kajay txumb'al utz, kajay ootzajib'al vettaq' qe.
- 9 Vetqootzajil vitxumb'al ti' u tuleb'al u Cristo va'l ye'ich ootzajib'e taq'o. Tan a' u b'a'nil itz'amal qi' taq'o.
- 10 Utz sa'nalitzojpi u Tioxh kajay q'u kam k'ajel nal ti' taq'o aas lo'opon vitiempoil. Tan sa'nali'an ma'l iatz kajay q'u kam taq'o, q'u'l atil vatz tx'ava'tuch' q'u'l atil tu Amlika. Utz u Cristo saq'esalain kajayil.
- 11 K'ajel nal qi' taq'o aas saetzano' ti' u b'a'nil k'atza utz, saetzano' ti' tere'n q'u kam tzixe' taab'a'b'en ti' inimal u Jesuus. A' va'l itz'amal tu u Tioxh, u b'anol tetz q'u kam kajayil.
- 12 Ech ab'iste o', o' b'axa okchil k'atz u Cristo, sa'xhkut'anb'a' u Tioxh tu vitechalil.
- 13 Tan aatz etab'i vinujul, aya' u b'a'nla chusb'al tetz chitpitchil tu paav utz, enima u Cristo; ok'ex k'atza. Yakich okoj ma'l vetechlal tetaanima, aya' u Tioxhla Espiiritu va'l tal u Tioxh aas sauli. Techlal aas ex tek ik'aol ime'al Tioxh.
- 14 Techlal majte aas sa'naltaq' tere'n q'u kam u Tioxh qe q'u'l alel taq'o sataq'e'. Loq' analen aas latiq'o tib' u kub'en tu b'enq'ii b'ensaj tzixe'. Ech sa'xht'anb'a'l u Tioxh tu vitechalil.

Q'u Niman Tetz U Jesuus Tu Eefeso. 1:15-16iv Q'u Niman Tetz U Jesuus Tu Eefeso. 1:23

*Vijajtu u Pablo tu u Tioxh aas sa'aq'ax itxumb'al
q'u niman tetz u Jesuus*

15-16 Echixe'at b'enamen nunk'ama Tioxh seti!. Nunnachpixsa'ex tunq'ilat unsik'let Tioxh chaj-paj. Tan nivab'i aas tiira k'ujlel ek'u'l ti' u kuB'aal Jesuus. Utz tiira tii'ex setib'ilaj majte ex niman tetz u Jesuus.

17 Nunq'ila sik'le u Tioxh, aya' u techalla iTat u kuB'aal Jesucristo. Nunjaj te aas sa'xhtaq' etxumb'al ti' q'u kam k'atza. Sik'uch tere'n kam sete. Ech sa'xhere'netootzaji kam b'anel tu u Tioxh.

18 Nunjaj te majte aas tiira sataq' elu'l vatzsaj sete kam chit va'l nikuchi'ia ti' tuch' txuq'txunchil. Setootzaji jank'al chit vitechalil q'u mam b'a'nil saetzano' ti' k'atza, o' niman tetz. **19** Utz setootzaji majte jank'al chit u lochb'al qetz nitaq' u Tioxh o' niman tetz. Tan tiira techal utz, ke'ch koj iya'eb'al.

20 Ik'uchka vimam txumb'al aas q'aav titz'pixsat u Jesuus xo'l q'u kamnaj. Utz ik'uchka majte aas toksa u Cristo sik'atza tiseb'al tu Amlika. **21** Ech toksa mam q'esala vi' kajay q'u kam: q'u yak'il, q'u ijle'm, q'u q'esalail utz, q'u b'aalil. Kajay q'u kam toksa tikuuenta. K'uxh q'u'l atil tu u tiempo cheel utz, k'uxh q'u kam q'u'l sachee taab'a'b'en.

22 Kajay q'u kam toksaka u Tioxh jaq' u tijle'm u Cristo. Utz toksa q'esala vi' q'u niman tetz kajayil.

23 Tan aatz q'u niman tetz echai' vichi'l u Jesuus, a' vinimal. A' vitz'ajel u Cristo q'u niman tetz. K'uxh a' vitz'ajel utz, u Cristo va'l nitz'ajsan. A' nitzojpixsan q'u kam ti' kajayil. Tan a' u q'esala ti' q'u kam kajayil.

Q'u Niman Tetz U Jesuus Tu Eefeso. 2:1v Q'u Niman Tetz U Jesuus Tu Eefeso. 2:11-12

U chitpitchil tu paavtib'a'nil u Tioxh

¹ Kamnajich etatin vatz u Tioxh b'anel ti' q'ul etacha'v, q'ul epaav. Loq' u Jesuus aq'on etiichajil k'atza. ² Tan ta'xh nicheb'ane' veti'anka. A' niche-tiq'o tetz u paav tu u vatz amlika tx'ava' tza'. A' nichenima tetz u tioxhil maalo va'l niq'esalin q'u maalola chaj aanxel nipaal ti' kajiq' va'l atil k'atz q'u qelol Tioxh. ³ A' q'u kam atichk'o' ma'x tiempo tzi'. Ta'xh tii nikub'ane' kam kusa', q'u tacha'v u kuchi'l utz, q'u kam q'u'l nitul tu kupensaar. Ech nichik'ulo'k qi' aas saku' u choob'al paav qi' tu u Tioxh. Echa' tere'n q'u aanimma ye' tootzaj Tioxh.

⁴ Pek tiira txumul vatz u Tioxh tan, ib'an tii qi'. ⁵ Aal vettaq'lu kutiichajil k'atz u Cristo tetz b'enq'ii b'ensaj, k'uxh aal kamnajich'o' siatz tu q'u ku-paav. Ech tib'a'nil ko'n u Tioxh k'uxh vetchitp'ex tu q'ul epaav. ⁶ Ela vetq'aavtitz'pixsa'o' u Tioxh tuch' u Cristo. Ech ela texh tuch' a' kumol tu Am-likha k'ujlelo' u Cristo Jesus tu u qatin k'atza. ⁷ Utz i'an ko'nkoxh ok u kam tzi', pek a' isa' ik'uchtu vitechalla b'a'nil tu q'u tiempo taab'a'b'en tza' aas nojchit tii qi'. Itxum kuvatz tiq'aq'al u Cristo Je-suus. ⁸ Vib'a'nil u Tioxh seti' atzi' k'uxh vetchitp'ex tu q'ul epaav tu vikuje' ek'u'l ti'. Utz yit' ex koj vetttx'akon, pek u Tioxh vet'oyan sete. ⁹ Yit' iq'aq'al koj eb'anone'. Ech ye'xhab'il ko'xh ma'j satoksa je' iq'ii ti'. ¹⁰ Tan Tioxh b'anonnaj qetz. Ti' u Cristo Jesuus ib'anvo'. Utz a' isa' qi' aas a' sakub'an q'u kam b'a'n, kam echa' b'anel ti' taq'o ko'xtene.

U paas atil tu taanimaq'u niman tetz u Jesuus

¹¹⁻¹² Atoj sek'u'l aas ye'kich ex k'atz u Cristo ma'x tiempo. Tan yit' ex koj Israeel, yit' ex koj itenam u

Q'u Niman Tetz U Jesuus Tu Eefeso. 2:13viQ'u Niman Tetz U Jesuus Tu Eefeso. 2:19

Tioxh b'anel. Ech toke' ye'k etokeb'al ti' u nuk'u'm va'l i'an u Tioxh tuch' vitenam. Niko'xh ti' q'u kam tala sataq'e'. Kam koj ma'j b'a'nil nichech'ia. Utz a'ich koj etioxh u itz'lich Tioxh. Tan ex q'u aanima q'u'l "yit' tzok'el koj el b'iil echil" nital q'u Israeel q'u'l tzok'el el b'iil ichi'l. Ech yit' ex koj itenam Tioxh vatz q'u Israeel.

¹³ Pek k'uxh tzian atichk'ex k'atz Tioxh tan, xaanyul'lex. Okyex k'atz u Cristo Jesuus ti' vikajal va'l el seti' ti' ichool q'ul epaav.

¹⁴ A' vet'ul oksan u paas u Cristo. Ech ma'l teko'n iatz q'u niman tetz taq'o, k'uxh Israeel utz, k'uxh yit' i!. A' ul isotzsa tu vikam vatz kurus u chi'k'ulaib' va'l atiche va'l nichjatxonon qib'ilaj, echa' tok ma'j b'itz!. ¹⁵ A' ul itzaasa q'u mantaar, q'u tzii q'u'l oknajich qi!. Tan a' va'l nichoksan u xo'l. Utz ma'l teko'n tenam vettb'enku ka' tanul q'u aanima taq'o q'u'l k'uxh jatxich tib' iatz. Tan vettmotxinima u Jesuus, ech vet'ok ib'a'n. ¹⁶ Ech tu vikam u Cristo vatz kurus, sotz u ch'a'o u jatxi'b' va'l atich xo'l ka' tanul q'u aanima. Vettoksa ib'a'n tuch' Tioxh. Ech ma'l teko'n vet'elku siatz. ¹⁷ B'a'nla yol tetz paas vettiq'o ul u Cristo tu q'u aanima q'u'l tzian k'atz Tioxh, echa' ex utz, tuch' tu q'u'l k'uxh tootzaj nal b'iil u Tioxh majte. ¹⁸ Tan tiq'aq'al ko'n u Cristo k'uxh ma'l texh qok vatz u Tioxh. Tan ma'l ko'n u Tioxhla Espiiritu atil sukuk'atza.

¹⁹ Ech toke' k'uxh ex puera aanima tu vechi'l utz, tu vetatin tu u vatz amlika tx'ava' tza', pek yit' ex tere'n koj puera aanima vatz u Tioxh. Pek ela texh etenamil tuch' q'u Israeel niman tetz u Jesuus. Ech tatine' k'aol me'ala aas molomal tib'

Q'u Niman Tetz U Jesuus Tu Eefeso. 2:20viiQ'u Niman Tetz U Jesuus Tu Eefeso. 3:6

tu ma'l atib'al. ²⁰ Aatz vetatin cheel tan, ech ex ma'l mam otzotz aas ma'l ko'n vixe'. Utz a' vixe' q'u chusb'al tal q'ul ichaj u Jesuus tuch' q'u alon tetz u yolb'al Tioxh. Pek a' u Sivan u Cristo, vitil u otzotz tixoob'al. ²¹ Ech oj ato'k'ex k'atz u Cristo, nech'i'i k'atza atzi!. B'a'nla nuk'imal etib' setib'ilaj. Utz sa'nalb'enexs tioxhla atib'al vatz u kuB'aal Amlika. Echa' ma'l totztioxh aas b'oono inuk'lu je' vi' itz'achil. ²² Utz k'uxh paarten aanimail ex tan, ma'l ko'n ex atilex k'atz u Cristo, nuk'imal etib', ex tatib'al Tioxh si'ane'. Sa'atin sek'atza tu viTioxhla Espiiritu.

3

U taq'onin u Pablo xo'lq'u puera aanimta tu u Tioxh

¹ K'uxh atil ku'in tu preeexhuil cheel, in Pablo tan, ti' ko'n talax viyolb'al u Cristo Jesuus sete, ex puera aanimta. ² Utz ab'imal setaq'o atzi' kam vitxumb'al u Tioxh seti' tu vib'a'nil tan, a' vetchajonin texo'l ti' talax viyolb'al sete. ³ Utz a' k'uchun u kam ve va'l ye'ich ootzajimal. Aya' va'l vetuntz'ib'a b'en talax b'iil sete tza'. ⁴ Utz tuul nesik'le u u' tza', sapaal etxumb'al tu q'u kam ye' ootzajimich, q'u'l k'uchel ve tu u Tioxh ti' u Cristo. ⁵ Aya' ma'l u kam va'l ye'xhab'il ko'xh ma'j e k'uchaxka veti'anka. Pek aatz cheel, vetik'uchlu u Tioxh tiq'aq'al u Tioxhla Espiiritu tu q'u alol tetz viyolb'al tuch' q'ul ichaj u Jesuus q'u'l txaael taq'o. ⁶ Utz kam koj u kam ye' ootzajimich tzi!, pek aya' va'l aas, ab'iste q'u puera aanimta q'u'l saniman u b'a'nla chusb'al, ela ko'n saetzan ti' u b'a'nil k'atz Tioxh tuch' q'u Israeel. Ela teko'n tetz q'u kam q'u'l tal u

Q'u Niman Tetz U Jesuus Tu Eefeso. 3:7viiiQ'u Niman Tetz U Jesuus Tu Eefeso. 3:15

Tioxh. Loq' tiq'aq'al u Cristo Jesuus. ⁷ Utz veti'an itxumb'al u Tioxh vi', vettaq' vijle'm ti' talax q'u kam tu q'u puera aanima tzi'. Loq' tiq'aq'al ko'n vib'a'nil u Tioxh sunk'atza tuch' u mam iyak'il k'uxh echí.

⁸ Tan aal ye'xh b'ojo oponnajkojin ti' ma'j q'u ya'teb'al ichaj u Jesuus. Pek k'uxh echí, aal in vetitxaa'in u Tioxh ti' en talax u b'a'nla yol texo'l, ex puera aanima. Aya' u b'a'nla chusb'al ti' Cristo va'l tiira ye'k iya'eb'al utz, ab'il koj tech ti' tootzajil kajayil. ⁹ Ech saval tu kajay aanima q'u kam q'u'l k'ajel nal ti' tu u Tioxh o'tene q'u'l ye'ich ootzajimal; aya' vitxumb'al u Tioxh va'l b'anonnaj tetz kajay q'u kam. ¹⁰ Ech i'an u Tioxh ech tzi' tan, a' isa' aas kajay q'u niman tetz u Jesuus, sipaxsa itziiul kam chit b'anel tu q'u'l ib'a'nla txumb'al u Tioxh q'u'l tiira chukchaj. Ech samotxtootzaji q'u q'esal tx'i'li'inajla aanxel q'u'l nipaal ti' kajiq' tu amlika, tuch' q'u q'esal maalola chaj aanxel. ¹¹ Ech va'l i'an u Tioxh tzi' tan, a' va'l k'ajich nal ti' taq'o utz, ye'k iya'e'. A' ul xe'tixsan taq'o u kuB'aal Cristo Jesuus. ¹² Ech tiq'aq'al u Cristo sa'tekveet kuxaan opon k'atz u Tioxh. Aya'l kuk'u'l so'opono' k'atza, ta'xhtzii oj k'ujlel kuk'u'l ti'. ¹³ Ech toke' nival sete aas txumunichko'xhex utz, q'aavi'ch'ex ti' equl ti' q'u tza'l q'u'l nipaalk'in. Pek aal setiq'o eyak'il tan, seti' nunb'anva. Ech txuq'txunojex. Tan oksab' eq'ii.

Vijajtu u Pablo tu u Tioxhaas sa'xhtaq' iyak'ilq'u niman tetz u Jesuus

¹⁴ Echixe'at nunq'ila sik'le u Tioxh seti', viTat u kuB'aal Jesucristo. ¹⁵ Aya' u cheesan tetz kajay

Q'u Niman Tetz U Jesuus Tu Eefeso. 3:16ixQ'u Niman Tetz U Jesuus Tu Eefeso. 4:3

q'u aanima atil tu Amlika utz, vatz tx'ava' tza'.
¹⁶ A' nunjaj seti' aas sa'xhtaqp' nimal ek'u'l u Tioxh tetaanima. Sataq' eyak'il utz, examlil tiq'aq'al u Tioxhla Espiiritu. Tan ye'k iya'eb'al tu vitechalil ti' kulochle'. ¹⁷ Nunjaj te majte aas atin koj chit u k'ujleb'al ek'u'l ti' u Cristo. Atin koj chit tetaanima. Ech tiira at se'enku sete b'a'nil aas tii u Tioxh seti'. A' vixe'al vetatin k'atza, echa' ib'en taq'il ma'j tze'. ¹⁸ Ech sa'xhetootzaji b'a'nil tuch' tere'n q'u niman tetz u Jesuus, kam chit b'anek taq'o utz, jank'al chit vib'antu tii u Cristo Jesuus seti'. Tan ;techal chitu! Echa' ma'j nimla kam aas sib' ivatz, nim tajan, tiira pim utz, ye'k iya'eb'al vit'ane'a'. ¹⁹ Tan ech ko'n koj i'antu tii u Tioxh seti' b'il vantzi' niqitz'a, pek sib'al. Ech sa'xhatin jank'al itxumb'al u Tioxh sek'atza taq'o.

²⁰ Nunjaj tu u Tioxh aas sa'xhetootzaji. Tan ;Mam Tioxh u Tioxh! Kajay ni'ane'. Utz echil ko'n koj ni'ane' vantzi' niqitz'a. Pek paalchu va'l sataq' vatz va'l nikujaj te. Loq' ta'xhtzii oj k'ujlel kuk'u'l ti'. ²¹ Ti' u Cristo Jesuus, tetz u techalil u Tioxh xo'l q'u niman tetz. Ech ko'xh ib'ena', ye'k iya'e'. A'i.

4

Vib'o'q'ol i'antu ma'l iatzq'u niman tetz u Jesuus

¹ Ech k'uxh in preexhu ti' u kuB'aal Jesuus tan, nival sete aas tinujul chit etxumb'al seb'ane', echa' va'l nital u Yolb'al Tioxh. Ech sik'ulo'k seti' aas ex niman tetz q'u kam q'u'l sik'lemalk'ex. ² Ye'k je'chil vatz seb'ane'. B'antajex maanxho. Atoj epaciensia. Utz tx'aktaj chit etib' ti' veb'antu tii'ex setib'ilaj. ³ B'antaj chit ya'l aas b'enamen ma'l evatz ti' inimal u Tioxhla Espiiritu tu u paas atil

Q'u Niman Tetz U Jesuus Tu Eefeso. 4:4x Q'u Niman Tetz U Jesuus Tu Eefeso. 4:12

texo'l. ⁴ Tan ma'l ko'n u Jesuus va'l vetsik'lenulo' k'atza. Ma'l ko'n u Tioxhla Espiiritu aq'el qe. Utz ela ko'xh ma'l ko'n u kam nikuch'ia tuch' txuq'txunchil. Echa' u chi'l aas ma'l ko'n k'uxh chukchaj iq'ab'aj. ⁵ Ma'l ko'n kuB'aals Amlika atile. Utz ma'l ko'n va'l nikunima, va'l k'ujlel kuk'u'l ti!. Utz kajay o' ela ko'n u vautiismo b'aner qaq'o. ⁶ Ma'l ko'n Tioxh atile, iTat kajay q'u aanima utz, aya' va'l niq'esalaino' utz, a' ti' kajay aanima. Utz a' va'l atil sukuk'atza majte.

⁷ Pek paarten u b'a'nil vettaq' qe junun o'. Te vetelka jank'al u b'a'nil isa' sataq'e'. ⁸ Ech toke' nital u Yolb'al Tioxh ech tza':

—Aatz b'enje' tu Amlika,
teesa b'en q'u kam tetz preeexhuil utz,
toya tu q'u aanima.— Chia.*

⁹ Utz kam koj tok nitale' aas: —b'enje'.— Chia. Pek tan, b'axal nal ko'p jaq' tx'ava' tu vikame'.†

¹⁰ Aatz u Jesuus va'l ku'l tzi', anko'xh va'l b'enje' tzian tib'a kajay q'u amlika atile. Ech til chaj ko'xh atilku tuch' u b'a'nil nitaq'e'. ¹¹ Taq' ijle'm lochb'al tetz q'u niman tetz. Ech atia ichaj u Jesuus b'enku taq'o. Atia alol tetz itxumb'al u Tioxh b'enka. Atia a' tetz ipaxsal paal itziiul u b'a'nla chusb'al. Atia ilol tetz q'u niman tetz u Jesuus. Utz atia chusul tetz. ¹² Ech q'u lochb'al taq'a tzi' tan, a' isa' satxakunsal ti' iyak'insal q'u niman tetz

* ^{4:8} Choktaj u Salmos 68.18. † ^{4:9} Aatz vib'antu kanaal u tx'i'li'inaj u Jesuus, nital u Pablo tza', nik'am ti' va'l nich'i'an q'u ijlenal ti' isub'ax ikoontra tu ch'a'o, aas nichimaa q'u tetz kajayil utz, nijatx vatz q'u sol. Choktaj u B'axa U' Itz'ib'a U Lu' 3.19.

[Q'u Niman Tetz U Jesuus Tu Eefeso. 4:13xi](#)[Q'u Niman Tetz U Jesuus Tu Eefeso. 4:18](#)

u Jesuus. A' sach'iisan tu u tatin k'atz u Tioxh utz, ti' u taq'on si'an sijununil vatz Tioxh. Ech jikom satiq'o tib' q'u kam xo'l q'u niman tetz u Jesuus. Echa' u kuchi'l, k'uxh chukchaj taq'on tan, ma'l ko'n iatz. [13](#) Ech kajay o' ma'l kuvatz sakuloch qib' ti' ik'uje' kuk'u'l ti' u Tioxh. Ma'l kuvatz sa'xhtere'nqootzaji viK'aol u Tioxh. Ech saq'anb'o' k'atza utz, ch'iichil si'an u kutxumb'al k'atza. Ech ela texh u kutxumb'al tuch' va'l ik'uch u Cristo si'ane', aya' va'l tiira tz'ajel vatz Tioxh.

[14](#) Ech yit'e'ch tere'n koj o' talaj nitxa' si'ane' aas niko'xhib'en itxumb'al sunchaj jalil. Yit' ech o' si'ane' q'u'l oora ko'xh isotsal ik'u'l tunjot paartenla chaj chusb'al. Aya' q'u'l nichus q'u sub'ulla chaj aanima. [15](#) Pek ta'xh tii sakub'an vinujul tuul sakub'an tii'o' qib'ilaj. Ech sach'ii'o' tu u qatin k'atz u Jesuus, u kuQ'esala. Aya' u Cristo va'l ech tatine' kuvi' sukuk'atza. [16](#) Tan oj ma'l chit kuvatz k'atza, k'uxh chukchaj qaq'on, ech o' u chi'l. Nuk'imai qib'. Tiira txayel qib', lochoib' nimotxkub'ane'. Echa' q'u chupb'al tib' b'aj tu kuchi'l aas niloch tib'. Ech oj echi, tiira b'a'n junun. Tx'anel ich'ii sikajayil. B'a'n chit tiq'ot tib' q'u kam qib'ilaj tan, nikub'an tii'o' qib'ilaj.

Vitxumb'al q'u niman tetzu Jesuus si'ane'

[17](#) Pek aatz cheel, nival sete utz, nunjaj tib'ii u kuB'aal Jesuus aas seb'an tii setib'ilaj. Ye' ko'xh eb'an ex echa' tere'n q'u puera aanima q'u'l ye' tootzaj Tioxh. Tan ta'xh nimotxi'an q'u ye'xtxoja kam nicee sik'u'l. [18](#) Nimotxi'an ech tzi' tan, ela tuch' tu uken atilku q'ul ipensaar. Tiira tzian k'atz

Q'u Niman Tetz U Jesuus Tu Eefeso. 4:19xiiQ'u Niman Tetz U Jesuus Tu Eefeso. 4:31

Tioxh tu q'ul itxoxtinil tan, tiib'ixnaj q'u taanima. Yi'sa' inimal u Tioxh. ¹⁹ Paat ye'kan nikana inachaxe' oj ye'xtxoq q'u kam ni'ane'. Vetmotxtaq' tib' tu u tz'ejxichil ti' ib'anax q'u tacha'v q'u'l ichi'l. Ech kam texh tzu'kinil ni'ane'. Ye'k ich'ixa'v k'uxh kam ko'xh si'ane'. ²⁰ Pek yit'e'ch koj seb'ane', ex niman tetz u Jesuus. Tan ech koj u chusb'al vetetab'i k'atz u Cristo. ²¹ Ta'xhtzii oj nojchit nimamal u Jesuus setaq'o utz, neb'an q'u chusb'al nitale'. Tan a' vinujul iq'omal tu vitxumb'al u Jesuus. ²² Utz kam q'u ye'xtxoja kam nicheb'an tuch'vechi'l veti'anka; paat aq'tajka. Tan yit' b'a'n koj; tiira yannaj tu u paav. Echa' ma'j q'e'na'j chi'l. ²³ Tiira ch'expixsataj q'ul etxumb'al; itz'poj etatin k'atz u Tioxh. ²⁴ A' setoksa va't u txumb'al va'l anal veticheesa u Tioxh sek'atza va'l nitiq'o vitxumb'al u Tioxh. Tan a' vitxumb'al u Tioxh q'u kam inujul. Tan nik'uche' aas jikom utz, xaannaj el k'atz paav.

²⁵ Ech paat aq'tajka u txub'a'l. Vinujul chit setal setib'ilaj sejununil. Tan kutz'ajel qib' suku-jununil. ²⁶ A'tzii, k'uxh su'ul ek'a'nal, pek ye' paavinex. Ye' eb'ana aas anko'xh nilakp evi' ti' ma'j kam ech q'ejal. ²⁷ Ye' etaq' tzii so'ok u tx'i'li'inaj ti' epaavin tu u k'a'nal.

²⁸ Ab'il nichtelq'e' b'aner, ye' elq'u ve'te'. Pek aq'oninoj tuch'iq'ab', jikom si'ane'. Ech aal sachee tzixe' siloch va'l niya'ta tetz. ²⁹ Niko'xh ma'j tzu'kin yol saje'ul tetzi'. Pek b'a'nla chaj yol setale', locho'm si'ane'. Tx'aner chit satab'i q'u aani-ma sa'ab'in. ³⁰ Ye' etxumunsa, ye' eqel u Tioxhla Espiiritu. Tan tiira oknaj sek'atza, etechlal ti' aas sateesa ex u Jesuus vatx q'u ye'xtxoq tu u tuleb'al.

³¹ Ye' eb'ana aas k'ay ko'xh ek'u'l. Ya'sataj

Q'u Niman Tetz U Jesuus Tu Eefeso. 4:32xiiiQ'u Niman Tetz U Jesuus Tu Eefeso. 5:5

q'u k'a'nal, q'u qetunchil, u tz'ejo yol ti' aanima utz, tuch' kajay q'u onkonil. ³² Pek jikojchit'ex setib'ilaj. Ex txumul vatz seb'ane'. Kuytaj etib' sejununil, echa' i'an u Tioxh sete aas ikuyex ti' inimal u Cristo.

5

Vipaal q'u niman tetz u Jesuus si'ane'

¹ Tan ech chit itxumb'al u Tioxh. Echixe'at b'antaj ech etxumb'al u Tioxh, ab'iste ex, ex tek ik'aol ime'al Tioxh tan, tii seti!. ² Tiiojex ti' emol, echa' i'an u Cristo aas i'an tii qi!. Aal taq' tib' tu kamchil qi!. A' u tx'olo'm u choob'al tetz u kupaaav ok vatz u Tioxh. Ma'l oya aas echa' tx'umq'ixsab'al ije'op vatz Tioxh.*

³ Ech eb'anchi aas sa'atin texo'l ma'j eesanib' tu b'ey tuch' aanima. Niko'xh b'anol tetz ye'xtxo. Utz ye'k seb'ane' aas ye'k enooeb'al ti' q'u kam. Paat ye'k sa'alax q'u kam texo'l tzi!. Tan ex tek aanima aas nexaanse'l etib' k'atz paav. ⁴ Ye' ko'xh yolonex tu sub'u'mla chaj yol. Niko'xh tzu'kin yol saelu'l tetsi!, q'u'l paat ye'k tokeb'al, q'u chan yol. Tan ye'k itxa'k. Pek a' setal yol aas a' sik'ama Tioxh. ⁵ Tan yit' sa'kojetzan tu viQ'esalail u Cristo utz, k'atz u Tioxh q'u aanima q'u'l niteesa tib' tu b'ey tuch' aanima. Niko'xh q'u b'anol ye'xtxo, q'u'l ye'k inooeb'al ti' kam. Tan ela ko'n tuch' nacho b'anich tioxh q'u acha'v tzi!.

* ^{5:2} Aatz u tx'umq'ixsab'al nije'op vatz Tioxh nital u Pablo tzi!, a' niyolonku ti' q'u chelem karne'l nichik'achax ok vatz Tioxh vi' u nachb'al Tioxh. Choktaj u Eexodo 29.18. A' nik'am ti' va'l i'an u Jesuus tu vikame!. Aatz nitale' aas "vitx'umq' ije'op" chia, a' toke' aas b'a'n ni'enku tu u Tioxh; nik'ule' niyolonka.

Q'u Niman Tetz U Jesuus Tu Eefeso. 5:6xivQ'u Niman Tetz U Jesuus Tu Eefeso. 5:18

6 Ab'ili'ch ko'xh eesanex tu b'ey tu unjoloj yol aas ye'k itxa'k. Tan niku' vik'a'nal u Tioxh ti' q'u'l niqelone' utz, ni'an q'u kam ech tzi'. **7** Ech ye' ko'xh eb'an etetz q'u kam ni'an q'u aanima tzi'. **8** Aatz ko'xtene b'a'ntan echa' tu uken atilk'ex. Pek aatz cheel, atil tek ok'ex k'atz u kuB'aal Jesuus utz, tu txijtxub'al tek atilk'ex. Ech k'uchtaj aas atilex k'atz u txijtxub'al. **9** Tan aatz va'l nicheesa u atinchil k'atz u txijtxub'al sukuk'atza tikuenta u Tioxhla Espiiritu, echa' b'a'nla vatz tze!. Utz aya' q'u'l tza': q'u mamaj b'a'nil, vib'anax vijikomal utz, vinujul. **10** Ech a' chit seb'an q'u kam q'u'l tiira b'a'n ni'enku tu u Tioxh. **11** Pek ye' eb'an etetz q'u kam va'l ni'an q'u aanima tu uken. Tan ye'k itx'ak. Aal yaataj q'u'l ech ni'ane!. **12** Tan aal ch'ixveb'al oj seyol setib'ilaj q'u kam ni'an tu mujel. **13** Pek aatz nitelu'l q'u kam vatzsaj tzi', yak nichee elu'l tu kajay q'u'l ni'ane!. Tan ech ni'an u txijtxub'al, nik'uch q'u kam ye'xtxoj. **14** Echixe'at nital u Yolb'al Tioxh ech tza':

—K'asen ab'iste axh vatchelaxh.
Utz lakpen xo'l q'u kamnaj.
Ech sitxijtxu'axh u Cristo.— Chia.

15 Ech b'antajchit'ex tzak'kin tu vetatine'. Ye' eb'an ex txoxkin, pek atoj etxumb'al ti' q'u kam. **16** Ye' ko'xh eb'uch u tiempo. Pek txakunsataj ti' ib'anax u b'a'nil chajpaj. Tan txaklel ib'anax u onkonil tu u tiempo cheel. **17** Yit' kan chaj ko'nkoxh seb'ane'. Pek paaloj etxumb'al tuul kam visa' u kuB'aal. **18** Ye' ko'xh q'ab'anex tan, ek'u'l nisotzsa. Pek aal a' chit tiira atoj ok sek'atza u

Q'u Niman Tetz U Jesuus Tu Eefeso. 5:19xvQ'u Niman Tetz U Jesuus Tu Eefeso. 5:30

Tioxhla Espiiritu. ¹⁹ Utz a' chit noj eloch etib' tu vetatin k'atz u Tioxh, tu eyoltu q'u yol tz'ib'amalka tu u u' tetz b'itzal Tioxh, tu eb'itzat q'u b'itzal utz, tu q'u b'itzal q'u'l nicheesa sek'u'l. B'itzataj, oksataj iq'ii u kuB'aal tuch' etaanima. ²⁰ Utz k'amataj chit kajay q'u kam tu u Tioxh b'enamen, u kuTat tu Amlika tib'ii u kuB'aal Jesucristo.

U tiq'ol q'u itz'in atzikatu atib'al sab'anaxi

²¹ Echen setx'ol etiq'ot etib' setib'ilaj, kam echa' isa' u Tioxh. ²² Echa' q'u ixoj, echen sinima imantaar q'ul ivinaj, echa' inimal u kuB'aal si'ane'. ²³ Tan a' iq'esala u ixoj vivinaj; a' vivi!. Echa' u Cristo tan, a' u q'esala xo'l q'u niman tetz; a' vivi' majte. Utz a' vichi'l q'u niman tetz. Tan a' u Chitol tetz tu paav. ²⁴ Tan kam echa' inimal u Jesuus tu q'u niman tetz u Jesuus, echat q'u ixoj majte, sinima q'ul ivinaj.

²⁵ Utz aatz ex vinaj, tiojex ti' q'ul etixoj, echa' i'antu tii u Cristo ti' q'u niman tetz. Tan taq'tib' tu kamchil ti'. ²⁶ Tal u Yolb'al Tioxh te utz, xaane'l k'atz u paav taq'o. Tan a' isa' tx'aatx'och tatin siatz, echa' itx'aal tu a' i'ana. ²⁷ Ech tiira tx'aatx'och tatin q'u niman tetz tu paav siatz, aas lu'lтиq'o. Paat ye'k b'ojo paav k'atza; tiira techal. Ye'k ma'j kam ye'xtxojo. Echa' ma'j b'a'nla oksa'm ye'k tz'il ti', yit' moch'el koj tib'. ²⁸ Ech kam echa' i'antu tii q'u vinaj ti' vichi'l, echat i'antu tii ti' u tioxoj si'an majte. Tan ab'il va'l tii ti' u tioxoj, anat ko'xh ni'an je' tii ti' atzi!. ²⁹ Tan ye'xhab'il ko'xh ma'j aanima nib'anon aas ye'k ko'nkoxh itxa'k ichi'l te. Pek nitzujb'e utz, tii ti'. A' va'l ni'an u Cristo tu q'u niman tetz tan, a' vichi'l. ³⁰ Utz o'

Q'u Niman Tetz U Jesuus Tu Eefeso. 5:31xviQ'u Niman Tetz U Jesuus Tu Eefeso. 6:7

itz'ajel vinimal, vichi'l utz, q'ul ib'ajil. ³¹ Ech toke' aas sataq'ka itat inan u vinaj utz, sik'ul tib' tuch' u tixoj. Ech ma'l teko'n saelka. ³² Sib' tok u yol tzl'. Tan ye'ich ootzajib'e veti'anka. Pek a' niyolonku ti' u tatin u Cristo tuch' q'u niman tetz. ³³ Pek aatz ti' q'u aanimma k'ulel tib', junun ex, ex vinaj, tiojex ti' q'ul etixojoj. Echa' eb'antu je' tii seti'. Utz atoj tatin vivinaj u ixoj siatz majte.

6

¹ Aatz ex k'aol me'ala, nimataj q'ul etxutx eb'aal. Ech sek'uche' aas nenima u kuB'aal Jesuus. Tan a' vijikomal. ² Tan: —Atoj tatin vatat vanan saatz. — Chu ma'l u mantaar va'l tiira ib'o'q'ol utz, atil iq'aq'al oj sanimali tal u Tioxh.* ³ Ech b'a'n ko'xh sapaalk'axh. Utz sib' u vatz aq'ii asaj tu u vatz amlika si'an taq'o tza'!

⁴ Pek aatz ex, txutxa b'aala, ye' ko'xh elak ivi' q'ul ek'aoleme' al. Pek jik ko'xh sechus tu viyolb'al u kuB'aal. Utz setoksa tu jik.

⁵ Aatz ex, ab'iste ex k'ayimal etib' tu aq'on, nimataj q'u b'aal etaq'on tu u vatz amlika tx'ava'tza'. Atoj chit tatin sevatz. B'antajko'hex jik tetaanima k'atza. Ech sek'uche' aas nenima u Cristo. ⁶ Ye'k seb'an echa' ni'an q'u aanimma q'u'l ta'xh ni'an ib'a'n vatz u b'aal taq'on. Tan a' isa' aas b'a'n chit se'enku tu u b'aal taq'on. Pek k'uchtaj aas ex taq'onom u Cristo; tuch' chit etaanima seb'an q'u kam. A' seb'an vitxumb'al u Tioxh. ⁷ Aya'l chit ek'u'l seb'an u aq'on; aya'l kala taq'on u kuB'aal neb'ane' utz, yit' taq'on koj aanimma.

* **6:2** Choktaj u Eexodo 20.12; u Deuteronomio 5.16.

Q'u Niman Tetz U Jesuus Tu Eefeso. 6:8xvii Q'u Niman Tetz U Jesuus Tu Eefeso. 6:17

⁸Tan ab'iste q'u b'a'n ni'an junun aanima, sa'nalti
iq'aq'al xe' u kuB'aal, k'uxh k'ayimal tib' tu aq'on
xe' ma'j aanima oj yit' i' majte.

⁹Utz echat ko'xh seb'an tu q'ul etaq'onom ma-
jte, ab'il ex, ex b'aal chaj aq'on. Eb'anchile aas
sako'xhepoyi. Atoj sek'u'l aas ela ko'xh ex tuch'
q'u aq'onom vatz u kuB'aal va'l ni'ilonk'asu'lo' tu
Amlika. Utz ye'k tel aanima siatz.

Q'u lochb'al tetz q'u niman tetzu Jesuus atile

¹⁰Pek aatz cheel hermanos, nival sete, iq'omoj
eyak'il k'atz u mam iyak'il u kuB'aal. ¹¹Koltaj etib'
vatz u tx'i'li'inaj. Txakunsataj q'u b'anb'al ch'a'o
xe' u Tioxh. Ech ye'k sisub'ex u tx'i'li'inaj. Pek tii
satxake'ex k'atz u Tioxh. ¹²Tan aatz u kuch'a'o, yit'
tuch' koj nojla aanima aas atil ikajal tuch' ichi'l,
pek tuch' q'u q'esal tx'i'li'inaj, q'u maalola chaj
aanxel, q'u'l q'esala tatin tu amlika ti' kajiq' tu
uken, tuch' q'u b'anol ch'a'o, lochol tetz u onkonil
tu u vatz amlika tx'ava' cheel.

¹³Echixe'at atoj etetz q'u b'anb'al ch'a'o va'l xe'
u Tioxh. Ech seq'i'l q'u tza'l aas lu'ul seti!. Utz tii
txaklelex aas ma't itzojpe!. ¹⁴Ech tii etatin k'atz u
Tioxh. Utz a' q'u b'anb'al ech'a'o seb'anb'e tza'. Tii
etatin tu vinujul tan, siloch'ex; echa' ma'j qitzb'al
aas ni'xhtaqq' yak'il. A' chit seb'an q'u kam jikom,
ech sikolex; echa' ma'j ch'ich' chale'k kolb'al vatz
etaanima. ¹⁵Noj epaxsa itziiul u b'a'nla chusb'al
tetz paas. Tan a' va'l echa' kolb'al tetz etajan.
¹⁶Utz a' chit ib'o'q'ol aas sa'xhk'uje' ek'u'l ti'
u Tioxh. Tan a' samajon tok u ka'tziunchil sek'atza
va'l nitoksa u tx'i'li'inaj; echa' u escudo b'anb'al
ch'a'o aas nimaj tok u yatz'b'al ti' u sol. ¹⁷Pek

Q'u Niman Tetz U Jesuus Tu Eefeso. 6:18xviiiQ'u Niman Tetz U Jesuus Tu Eefeso. 6:24

a' u kolb'al tetz vepensaar aas a' tii setitz'a u chitpichil tu paav; echa' vicasco u sol aas nikol vivi'. Utz txakunsataj u Yolb'al Tioxh aq'el tu u Tioxhla Espiiritu tan, a' va'l echa' ech'ich'.

¹⁸ Utz q'ilataj sik'letaj Tioxh b'enamen. Q'ilataj sik'letaj Tioxh titxumb'al u Tioxhla Espiiritu. Tzuk'elex ti'. Utz q'ilataj sik'letaj Tioxh ti' q'u niman tetz u Jesuus. ¹⁹ Utz nachtaj Tioxh vi' majte. Ech chajpaj sayolonin ti' u b'a'nla chusb'al, sachee unyol kam saval ti' utz; ye'k xo'val saval q'u kam ye'ich ootzajimal ti'. ²⁰ Tan in ichaj utz, ivatzil u Tioxh tu u vatz amlika tx'ava' tza', k'uxh qitzel unpaal ti' talax u b'a'nla chusb'al. Ech tiira taq' koj unyol u Tioxh ti' talax vatzsaj b'a'nil, ye'k unxo'val kam va'l saval ti'.

Itzojpu u u' tza'

²¹ Sunchaj opon u kub'a'nla hermano Tiiiquico tzexe', va'l tiira tii'in ti' tan, jikom nitaq'onin ti' u kuB'aal utz, k'ujleb'al k'u'l. A' toj alon sete kam nipaalk'in utz, kam numb'ane!. Ech setootzaji. ²² Ech vetunchaj opon tzexe' ti' u kam nivale' tzi', ech setab'i kutziuil utz, ech satxuq'txunex taq'o majte.

²³ Hermanos, u Tioxh, u kuTat tu Amlika, tuch' u kuB'aal Jesucristo koj aq'on u paas texo'l. A' koj lochonex ti' eb'antu tii'ex setib'ilaj. Utz a' koj lochonex aas sak'uje' ek'u'l ti'. ²⁴ Ech atil koj vib'a'nil u Tioxh seti', kajay ex tz'ejel etaanima ti' u kuB'aal Jesucristo, ab'iste ex nojchit ta'n tz'ejel etaanima ti' ye'k iya'e!. A'i.

**Viak'la txumb'al u tioxh
New Testament in Ixil Cotzal; ixl (GT:ixl:Ixil)**

copyright © 2001 Wycliffe Bible Translators, Inc.

Language: Ixil

Dialect: Cotzal

Translation by: Wycliffe Bible Translators, Inc.

Copyright Information

© 2001, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ixil

© 2001, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

xx

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022
ded0b994-e0fe-5888-83c4-9cf32f4765e1